

दिनांक 16.09.2025

समय: 18.45 बजे

आकाशवाणी जयपुर—अजमेर

प्रादेशिक समाचार

- प्रदेश मांय काल ग्रामीण अर शहरी सेवा शिविर सुरू व्हेला—मुख्यमंत्री भजन लाल शर्मा जयपुर मांय आं री सुरूआत करेला।
- प्रधानमंत्री नरेंद्र मोदी रा जन्मदिवस रे मौके काल ऊँ 2 अक्टूबर ताई सेवा पर्व मणायो जावेला।
- केन्द्रीय गृह मंत्री अमित शाह नशीली चीजां रा निपटारा ऊँ जुड्या ऑनलाईन अभियान री सुरूआत कीनी—कह्यो, मादक पदार्थ मुक्त भारत अभियान देश रा हर जिला मांया चलायो जावणो चाहिजे।
- देश मांय 2025—26 रबी मौसम सारू अन्न री उपज रो राष्ट्रीय लक्ष्य 362 दशमलव 5 मिलियन टन तैय करी ज्यो।

प्रदेश मांय काल **ग्रामीण अर शहरी सेवा शिविर** सुरू कर्या जावेला। मुख्यमंत्री भजन लाल शर्मा जयपुर मांय आं री सुरूआत करेला आं रो मकसद जनता री समस्यावां रो बेगो निपटारो अर जरूरी सेवावां एक ही ठाँड मुहैया करावणो है। शहरी सेवा शिविरां रे मार्फत राईजिंग राजस्थान निवेशक सम्मेलन मांय मिल्या निवेश प्रस्तावां सारू जमीं तैय कर र वां री मंजूरी देवण, अटल पेंशन योजना, प्रधानमंत्री सुरक्षा बीमा योजना, वृद्धावस्था, विधवा अर विकलांग पेंशन ऊँ जुड्या काम निपटारा जावेला। पीएम अर सीएम स्वनिधि योजना रा तैत अर्जियां लेवण अर जूना मामलां रा कर्ज देवण रा काम ई कर्या जावेला। ई रे अलावा सफाई व्यवस्था मांय सुधार, नाळियां री मरम्मत, प्रकाश व्यवस्था, गाड़ियां ऊबी करण री ठाँड तैय करण, लीज होल्ड अर फ्री होल्ड पट्टा जारी करण समेत केई काम कर्या जावेला। ग्रामीण सेवा शिविरां रे ज़रिए ई न्यारी—न्यारी सरकारी योजनावां रो फायदो लेवण सारू अर्जियां ने मंजूरी देवण रा काम ई कर्या जावेला। ई सागे ई गेला खोलण, स्वामित्व पट्टा बणावण, गिरदावरी करावण, टूटी—फूटी स्कूलां अर आंगनबाड़ी केन्द्रां रा सुधार समेत न्यारा—न्यारा काम कर्या जावेला।

प्रधानमंत्री नरेंद्र मोदी रा जन्मदिवस रे मौके काल सेवा पर्व सुरू कर्यो जावेला। उपमुख्यमंत्री दिया कुमारी आज करौली जिला रा पदमपुरा गांव मांय बणायी ज्यो नुवो प्राथमिक स्वास्थ्य केन्द्र जनता ने संपण रे मौके राखी ज्या कार्यक्रम मांय आ जाणकारी दीनी। वे बतायो के 2 अक्टूबर ताई चालण वाळा सेवा पर्व रे दौरान जनता री परेशानियां तुरत निपटायी जावेला अर जनता रा भला री योजनावां रो फायदो हर जरूरतमंद जणा ताई पूगायो जावेला। ।

दिया कुमारी कह्यो के पदमपुरा गांव मांय बण्या ई स्वास्थ्य केन्द्र ऊँ गांव वाळां ने टेमसर ईलाज मिल सकेला। ई मौके उपमुख्यमंत्री सड़क बनावण रो ऐलाण ई कीनो।

लोकसभा अध्यक्ष ओम बिरला रो काल ऊँ कोटा-बून्दी संसदीय हलका रा नौ दिन रा दौरा रो कार्यक्रम है। श्री बिरला प्रधानमंत्री नरेन्द्र मोदी रा जन्मदिन रे मौके राख्या जावण वाळा न्यारा-न्यारा कार्यक्रमां मांय शामिल व्हेला। लोकसभा अध्यक्ष शक्तिनगर मांय राख्या जावण वाळा स्वच्छता अभियान कार्यक्रम मांय ई शामिल व्हेला। ई पाछे वां रो थकड़ा मांय नमो स्वास्थ्य जांच अर सुपोषण शिविर मांय शामिल व्हेवण रो कार्यक्रम है। लोकसभा अध्यक्ष रामगंजमण्डी मांय सुपोषित माँ अभियान रा तीजा दौर री सरुआत करेला। ई दौरान आस वाळी केई लुगाइयां ने पोषण किट बांट्या जावेला।

काल ऊँ ही प्रदेश मांय **“स्वच्छता ही सेवा अभियान”** सरु व्हेला। दो अक्टूबर तांई चालण वाळा ई अभियान रो मकसद स्वच्छ भारत मिशन ने और मज़बूत बनावण, जनत मांय साफ़-सफ़ाई रा बारा मांय जाग जगावण, जनता री आवण-जावण री ठौड़ां ने साफ़ अर प्लास्टिक मुक्त बनावणो है। पंचायती राज मंत्री मदन दिलावर बतायो के ई अभियान रो खास मकसद सगळां री भागीदारी ऊँ सफ़ाई रा सिद्धांतां ने बधावो देवण सारु उत्सव रा रूप मांय मनावणो है।

प्रदेश मांय काल **स्वस्थ नारी-सशक्त परिवार अभियान** अर **सांस्कृतिक सृजन पखवाड़ो** ई सरु व्हेला। सांस्कृतिक सृजन पखवाड़ा रा तैत राजस्थान संगीत नाटक अकादमी, जोधपुर री ओर ऊँ प्रदेश री सगळी अकादमियां री मदद ऊँ भांत-भांत रा सांस्कृतिक अर साहित्यिक कार्यक्रम राख्या जावेला। और ब्योरो म्हाणा खबरनवीस ऊँ-

संसदीय कार्यमंत्री जोगाराम पटेल कह्यो है के प्रधानमंत्री नरेन्द्र मोदी री अगुवाई मांय देश री माली व्यवस्था मांय जबरदस्त बदलाव आया है। वे आज जयपुर मांय खबरनवीसां सागे बातचीत कर रह्या हा। पटेल कह्यो के जीएसटी परिषद् कानी ऊँ लारला दिनां करी ज्या सुधार ई नज़रियां ऊँ खास है। ई महीना री 22 तारीख ऊँ लागू व्हेवण वाळा आं सुधारां ऊँ जनता ने घणो फायदो मिलेला। होने वाले इन सुधारों से आम जनता को बहुत फायदा मिलेगा।

केन्द्रीय गृह मंत्री अमित शाह कह्यो है के मादक पदार्थ मुक्त भारत अभियान देश रा हर ज़िला मांय चलायो जावणो चाहिजे अर सगळा शिक्षा संस्थानां ने इण ऊँ जोड़ना चाहिजे। वे आज नई दिल्ली मांय राज्यां अर केन्द्र रा राज वाळा प्रदेशां रा मादक पदार्थ रोधी कार्यबल रा मुखियां रा दूजा राष्ट्रीय सम्मेलन रा उद्घाटन सत्र मांय बोल रह्या हा। शाह कह्यो के नशीली चीजां रे खिलाफ़ लड़ाई केन्द्र अर राज्य सरकारां रा सगळा महकमां कानी ऊँ मिल र एके सागे काम करण ऊँ ई सफल व्हे सके है। गृहमंत्री कह्यो के फिलहाल देश रा 372 ज़िलां मांय चलाया जा रह्या ई अभियान ऊँ दस करोड़ लोग अर तीन लाख शिक्षा संस्थान जुड़्या है। श्री शाह कह्यो के मोदी सरकार देश ऊँ नशीली चीजां खत्म करणो तैय कीनो है।

ई मौके श्री शाह मादक पदार्थ नियंत्रण ब्यूरो –वार्षिक रिपोर्ट 2024 जारी कीनी अर नशीली चीजां रा निपटारां ऊँ जुड़्या ऑनलाईन अभियान री ई सरुआत कीनी। दो दिन रा ई सम्मेलन रो मुद्दो है—**संयुक्त संकल्प, साझा दायित्व।**

देश मांय 2025–26 सिंयाळू साखां री उपज 362 दशमलव 5 मिलियन टन करणो तैय करी ज्यो। केंद्रीय कृषि अर किसान कल्याण मंत्री शिवराज सिंह चौहान राष्ट्रीय कृषि सम्मेलन –रबी अभियान 2025 रे दौरान राज्य रा कृषि मंत्रियां सागे चर्चा पाछे नई दिल्ली मांय खबरनवीसां ने आ जाणकारी दीनी। वे बतायो के ई साल लारला साल री तुलना मांय साखां री उपज 2 दशमलव 4 फीसदी बत्ती लेवणो तैय करी ज्यो है। वे भरोसो दिरायो के देश री जरूरतां पूरी करण सारु जरूरी बीज भंडार मौजूद है। मंत्री कह्यो के सम्मेलन रो मुद्दो **“एक राष्ट्र, एक कृषि, एक टीम, खेती–बाड़ी रा हलका** मांय तालमेल अर भागीदारी मजबूत करण ओड़ी खास कदम रो दरसाव करे है।

आज विश्व ओजोन दिवस है। ई मौके भांत–भांत रा कार्यक्रमों रे जरिये ओजोन परत ने बचावण रा बारा मांय जाग जगायी जा रही है। करौली मांय स्काउट–गाइड री ओर ऊँ जूनी नगर पालिका ऊँ स्टेडियम ताई जागरूकता रैली निकाळी ज्यी। वठे पोस्टर, निबंध अर भाषण री होड़ां ई राख्यी ज्यी। अजमेर मांय स्कूली विद्यार्थियां ने साफ़ आब–ओ–हवा रो सन्देश देवण वाळा नान्हा नाटक खेली ज्यो। बारां रा पीएमश्री केन्द्रीय विद्यालय मांय वन विभाग अर प्रदूषण नियंत्रण बोर्ड री मदद ऊँ कार्यक्रम राख्यी ज्यो अर केई होड़ां राख्यी ज्यी। ई मौके बच्चां ने पर्यावरण बचावण री शपथ ई दिरायी ज्यी।

पाली जिला मांय रोहट री सरकारी प्राथमिक स्कूल रा विद्यार्थियां ने योगाभ्यास करायी ज्यो अर पर्यावरण ने बचावण रा बारा मांय कार्यशाला राख्यी ज्यी। सादड़ी रा राजकीय उच्च प्राथमिक विद्यालय मांय **प्लास्टिक हटाओ–जंगल बचाओ** मुद्दा माथे होड़ राख्यी ज्यी। सवाईमाधोपुर मांय कलेक्ट्रेट परिसर ऊँ पर्यावरण जन चेतना रैली निकाळी ज्यी, जिण मांय मोटी तादाद मांय स्कूली विद्यार्थी, स्काउट–गाइड, खिलाड़ी अर नौजवान शामिल व्हा।

माली साल 2025–26 सारु इन्कम टैक्स रिटर्न–आईटीआर दाखिल करण रो बगत आज रात 12 बज्यां ताई बधा दियो ज्यो है। इन्कम टैक्स महकमां ऊँ मिली जाणकारी रे मुजब आकलन वर्ष 2025–26 सारु हाल ताई सात करोड़ ऊँ बत्ता रिटर्न दाखिल कर दिया ज्यो है।
